

Walla is schüa

Äs Walla, ihr Leut, äa Walla is schüa,
benn Mai is, un dausa die Flura warn grüa.
Ganz vorna zwä Fahna, da Heiland am Kreuz,
un laut werd gesunga, vom Kirchturm doa läuts.
Trompettr, Posauna, die müssa sich ploag,
am Korl sei Klarinettla kümmt manchmol niat noach.
Da Baß blöast ömmer än änzige Ton,
die Hauptsach, es brummt. Bar merkt denn doas schon?
Da Pforr guckt würdig un gäat in da Mitt.
As Fräla am Schluß kümmt manchmal niat mit.
So gäats durch die Flura mit Gsang un Gebaat
zum Herrgott da dowä um Segä un Gnad,

Bal sieht ma as Dörfla vo fern scho als Ziel.
Ma hört scho da düwa die annera spiel.
Vo drei Seitä kumma die Walleut heut oo,
doa häßt's sich racht eila, die sen scho bal doo.
Bar zuletzt kümmt, findt vool in de Kärch alla Plätz,
drömm gitts jetzt zum Schluß a gewaltige Hetz.
Da Kreuzträger läfft schoa, die Prozessio rennt,
da Pforr wärd ganz zornig, er fuchtel un schennt.
Die Kärch voll gerammelt, die Orgel setzt ei,
äs Fräla vom Nochbr quetscht grad sich noch nei.
Due Buwa, die schubsa un streita sich römm,
de Pforr am Altar guckt ~~wütend~~ wütend sich ömm.

Benns aus is, tröt alles neis Wiatshaus sein Duurscht.
A Bier gitts un Wallweck un a Viertala Wuurscht.
Da Egit söift duurschtig sein Schnaps aus an Glos,
da Lubba sitzt still un trinkt sei drütt Moaß.
Die Weibslaut besücha Vewandtschaft derweil,
sie leera die Tassa, die Taaler in Eil.
Es gitt doa an Kaffee un Kucha dazu,
a Stündla is Pausa, a Stündla is Ruah.

Doa läut scho ...

Doa läut scho äs Glöckla, es gäat widdr loos.
Bu bleit denn däs Fräla, bu bleit denn däs bloaß?
Im Oofang sen nur ganz wenig Leut doo,
sie kumma erscht später un schließe sich oo.
Die Köpflich sen roat un die Knie schlacht geschmiert,
da Onkel düt wockl, die Tant sich scheniert.
Da Egid un da Lubba, die könna schlacht laff,
die trön uffn Buckel a großmächtige Aff.
As Baata un Singa wärd jetzt zu a Pöag,
em Korl sei Klarinettla gickst ömmer noch noach.

Da Herrgott vo Franka hot wahrlich Humoar,
a kennt doch sei Leut, a kennt doch sei Woar.
A schickt sei Walleut an Sengensgruß roo,
a Güßla vom Himmel kühlt alles gleich oo.
Zum Glück is es Dörfla scho goarniat mehr weit.
Jetzt singt noch mol kräftig un batt feest, ihr Leut!

En Heiland am Kreuz schmückt a Wedel racht grüa.
Mer sen gleich dahäm. -- Äs Walla woar schüa!